

穆
堂
別
稿

穆堂別藁卷之二十七

臨川李紱

巨來

序四

旗分志序

國家龍飛東海

列聖肇基顯庸創制始立四旗復鑲爲八旗丕應篋志兆姓歸
往

正號紀元遂成

帝業凡蒙古漢人輸誠先服者亦各編爲八旗列在親信迫
我

世祖章皇帝統一四海有明舊臣率先慕義者皆得編在旗籍
于是定兩翼之位列八旗之方拱衛

皇居星羅碁置又以鑲黃正黃正白爲

上三旗餘五旗統以宗室王公居重馭輕大宗維翰蓋皆
創前古所未有而建諸天地考諸三王若合符節粵稽
史記天官書正義河鼓兩旗左旗九星在河鼓左右旗
九星在河鼓右皆天之旗鼓以爲旌表又九旂九星在
玉井西南則天子之兵旗也周禮司常掌九旗之物名
田之日司馬建旗于後表之中途人起野役以遂之大
旗致之蓋在天垂象惟聖時憲泣軍徵衆莫不于旗乎

有取焉我

世宗憲皇帝宣明

祖制特修八旗志書將使

謨訓功烈垂示萬世敬稽

國初以來創立八旗及增定規制載在舊章者列諸首簡

作旗分志

八旗土田志序

國家發祥于長白山之東其地名俄漠惠至

肇祖原皇帝取蘇克蘇許河乃遷國于虎欄哈達山下赫圖阿

喇地傳三世爲

興祖直皇帝生子六人各主一地稱爲寧古塔貝勒

景祖翼皇帝行第四獨居故都至

太祖高皇帝取遼陽建興京

太宗文皇帝盡有遼東之地乃建盛京是時東至于海西極鄂爾多斯幅員萬里盡入版圖王公以下各有分地俾立室家長子孫規模已宏遠矣順治元年定鼎燕京

世祖章皇帝特諭撥近京州縣民人荒田及明朝皇親駙馬公侯伯太監等莊田分給東來諸王勲臣兵丁人等又盡定旗地凡民人土田錯雜者另給官田互易酌量所易遠近減免賦稅夫帝王之興有開必先有明鼎革勲戚

逃亡郊畿五百里內遂多閒田曠土豈非

天之預爲佐命人員食土開疆地哉至撫順開原諸路向爲沙磧瘠土自

本朝龍興于此陰陽和會山海鍾毓草木鳥獸咸若物產之美爲九州上腴蓋

天眷所在地脉隨之唐虞之賦冀州上上周原膺膺萑荼如飴此古帝王之盛復見于今日者也

國初下令展邊開墾嗣復

特遣大臣親往踏勘得膏腴數百萬頃由是八旗人士內有閒田可以資生外有草地可以墾種不假間閭尺寸而就

地轉移正其疆索遂使新畬舊壤咸得我所重以

聖祖仁皇帝許謨善政次第施行凡園撥之地均相度之宜務
爲經久之法無不裁成盡善至我

世宗憲皇帝睿慮深遠

特命查取直隸餘田畫爲井地令旗人之無產業者分授百畝
同養公田則八旗之生齒日繁而井疆亦日闢從此各
安世業擁衛

神京洵千萬世無窮樂利矣謹考據簡冊將經畫規制之
詳具載于前而以

畿輔奉天及各直省撥給土田分誌于後作土田志

八旗營建志序

國有六職百工與居一焉周禮六官並首言辨方正位
體國經野蓋建國居民營建其大事也

國家肇基東土綢繆締造始築界凡之城繼立
興京

盛京兆民所歸建國設都其爲營建由來遠矣

世祖皇帝定都今

京師一統之模大備都城之內八旗居址列于八方自王
公以下至官員兵丁給以第宅房舍並按八旗翼衛

宸居其官司學舍倉庾軍壘亦按旗分羅列環拱較周禮量

穆堂別業

卷之二十七

人所掌城郭市朝道巷門渠之法匠人九經九緯之規
尤爲廣大周密外至直省分設八旗駐防城堡營壘咸
載

天威創制之善周乎四海傳之萬世而無旣矣敬稽
國家建置營繕切于八旗者作營建志

八旗職官志序

八旗設官分職文膺心膂武寄干城所以和庶政而綏
兆民佐

聖朝億萬世昇平之治也天聰八年

太宗文皇帝特諭臣工更定八旗官名悉遵

國初之制不必仍明朝舊稱改總兵官爲昂邦章京副將
爲梅勒章京叅將遊擊爲甲喇章京備禦爲牛叅章京
順治十七年

世祖章皇帝復對定漢文官名以固山額真爲都統梅勒章京
爲副都統甲喇章京爲叅領牛叅章京爲佐領昂邦章
京爲總管其滿文則悉由舊章我

世宗憲皇帝復增五等世職漢文官號蓋累世相承迺有創制
成出

聖心前無所述昔太皞氏爲龍師而龍名炎帝氏爲火師而火
名軒轅氏爲雲師而雲名三皇繼治不相沿襲所謂禮

樂文章得而損益者也至于在

京部院衙門及直省督撫提鎮並仍明舊惟

京官則悉增滿缺直省則滿漢參用今敬考八旗官制建設本末及增設滿缺備著于篇其銓選考察之法亦附纂于後作職官志

八旗兵制志序

旗者期也說文謂熊旗五旂士卒以爲期八旗之志宜莫重于兵制矣

國家以神武定天下兵制之盛爲古來所未有天命三年夏四月

太祖頒訓習兵法之書于統兵貝勒諸臣約四百餘言自是戰勝攻取方行海表至于

太宗敕令益詳版圖益廣

世祖統一寰宇海隅日出罔不率俾

聖祖平三藩收臺灣三征沙漠西藏底定從古梯航不及之區

莫不來享來王我

世宗憲皇帝御極之初命將出師青海大捷受俘闕下

威德廣遠萬方震疊稽古軒轅氏仰觀積卒星象爰立兵法
風后演爲握奇八陣歷代奉爲陣法之祖蓋積卒之星

內四外八而我

朝兵制由四旗增爲八旗斯

聖人首出與天地合其德者也合詳加叅稽作兵制志

八旗學校志序

粵稽載記建國君民敎學爲先作君者卽作師者也

國家自

祖宗以來興賢育才敎養備至

建都盛京時卽試錄儒士廣加蒐羅迫入關

定鼎文德武功光被區宇凡八旗子弟身際隆平鼓弓鼓

篋敦品行習禮儀胥于學校是賴于是自國學順天奉

天二府學分派八旗生監外又有八旗兩翼咸安官景

山諸官學宗人府宗學覺羅學并

盛京黑龍江兩翼義學規模次第加詳其間世家賢子暨
閑散俊秀涵濡教化陶詠文章彬彬乎賢材蔚起矣古
者上下庠東西序皆在天子近郊蓋大學小學隸京邑
者固不止成均也我

朝創制立法所以作養人材者雲漢天章光于四海而八旗
學校與義學兼設尤爲酌古宜今可大可小猗與盛哉
爰稽設立增定本末爲學校志而歲貢拔貢諸生亦附
列于末焉

八旗典禮志序

國家受命誕興萬方雲附性情風尚宜有以整齊之顧敘
行自近議禮制度端自八旗始天命開基禮尚易簡而
尊卑上下之辨所以定民志者視漢法加嚴崇德收元
後惇庸典禮綱舉目張祖堯舜憲文武兼漢唐宋元明
之法而損益之禮文益加明備載在會典爲八旗典禮
者視漢人通用之禮尤整肅焉蓋自

世祖章皇帝創制天下

聖祖仁皇帝顯謨承烈于八旗禮文隨時增定準古宜今美善
悉備我

世祖憲皇帝以天亶之聖繼志述事加意修明是以觀禮于八

旗會典所載滿漢通行者半而詳析謹嚴專行于八旗者殆不止于半蓋漢禮所謹惟及于士大夫而閭閻黠蒙不備賁焉昔人謂婚喪之禮多僭則漢俗然耳八旗之禮自王公以迄兵丁閒散之人大而享祀婚姻小而輿馬服飾器用莫不井然有條秩然不紊垂諸萬年永爲法守道德一風俗同惟八旗爲能然耳謹將制作原委及更定始末專爲八旗設者彙列于篇作典禮志

八旗藝文志序

書契者百官所由治萬民所由察也我

國家神武開基而本仁祖義實由文德故大文炳耀上與

雲漢爲昭自

太祖高皇帝創制清書始立文字

列聖繼治光華日啟

詔令誥諭以時頒布皆以政事發爲文章芟蕪浮詞不用所謂
六經之文簡嚴易直而天人備者也我

世宗憲皇帝重華復旦大綱小紀無一不出自

聖衷播爲典謨其所以振起人文涵育教訓者至詳且備用是
八旗俊乂應運奮興後先繼美詩書騎射並習兼優其
才華之典贍足以道揚盛美黼黻太平而魏晉以後浮
靡駢麗之詞濫入章奏更唐宋元明莫能洗滌淨盡者

至我

朝始廓清之蓋駸駸乎唐虞賡拜之餘風焉按直省志書
例志藝文自帝王勅諭制誥及士大夫詩歌文詞關係
本地者並載不遺今敬稽

祖宗勅諭臣工之辭凡有關八旗事宜一篇之中兼舉數事各
志不能分載者編年紀月冠諸藝文之首而八旗臣工
奏議爲旗務而發者並載于篇至于各旗員歌頌之什
載在

萬壽盛典

幸魯盛典諸書曾經進

呈者悉分類排編附于卷末用昭

文明之治作藝文志

八旗封爵表序

親王以下八分公以上皆所以統轄乎下五旗者也志入八分公以下奉恩將軍以上則皆八旗之所統轄者也書志八旗則封爵之典不可以不詳矣

國初爵號止于貝勒崇德元年始定王公封典親王郡王貝勒貝子鎮國公輔國公鎮國將軍輔國將軍奉國將軍凡九等或以展親或以酬庸或以至親而兼大功一時封爵所及

天恩浩蕩本支百世興至盛矣順治十年定襲封之例親王郡王一子襲爵其餘諸子降封一等貝勒以下子並以次遞降一等授封至第九等奉國將軍子授奉恩將軍奉恩將軍子孫世授奉恩將軍永永勿替共爲十等蓋祖宗以來克明俊德以親九族故推恩之厚如此

國家慶祚光昌

天潢支派日盛康熙二十三年宗人府議奏親王一子襲爵其餘諸子皆授爲貝子郡王一子襲爵其餘諸子皆授鎮國公

聖祖仁皇帝特旨親王諸子授爲貝勒郡王諸子授爲貝子又

特定恩典貝勒貝子子孫降封至輔國公者一子授輔國公罔替

殊恩異數垂于無窮

世宗憲皇帝嗣統特加意玉牒慎重纂修封爵燦然具著于簡
謹按宗人府移送

冊封冊籍敘其先後承襲世次作封爵世表其八旗異姓王公侯伯子男附于末卷蓋酬庸之典賢賢與親親宜得並見未可畧也宗室之爵止于公下列四將軍不封侯伯異姓有王公侯伯無子男康熙初年吳耿作逆王爵削不復封惟存公侯伯亦各分三等雍正季年從臺臣

請令八旗通志館議八旗世職漢文名號因階次所及以精奇尼哈番爲子爵阿思哈尼哈番爲男爵三等如故此二世職遂由世職表移置封爵表之末雖俸祿無改而名號加重矣

八旗世職表序

國家誕膺

天眷卜世悠久而褒德酬庸所以推

恩八旗者則有世襲之官以昭作忠之訓

太祖

太宗締造鴻基翼運功臣並授總兵副將叅將遊擊備禦等世

職以示獎勵天聰八年四月

特頒諭旨更定官名凡賞冊書名一等總兵官爲一等昂邦章京二等總兵官爲二等昂邦章京三等總兵官爲三等昂邦章京一等副將爲一等梅勒章京二等副將爲二等梅勒章京三等副將爲三等梅勒章京一等參將爲一等甲喇章京二等參將爲二等甲喇章京遊擊爲三等甲喇章京備禦爲牛录章京

世祖統一寰區諸臣功烈益偉得世職者益衆順治四年十二月以昂邦章京等號皆管兵官銜因改世職之昂邦章京爲精奇尼哈番梅勒章京爲阿思哈尼哈番甲喇章

京爲阿達哈哈番仍各爲三等牛錄章京爲拜化喇哈
勒哈番半箇前程爲拖沙喇哈番嗣後世職之官遂有
專名焉十七年十二月

特諭吏部世襲官職得之不易國家延世報功典至重也不幸
無子孫者卽行停襲殊爲可憫凡係無親生子孫有本
生祖父及親伯叔兄弟姪男姪孫概許襲替永著爲例
如有照前議停襲者爾部卽遵此諭察明應襲之人開
列具奏

深仁厚澤親臣世臣感淪肌髓矣

聖祖臨馭六十餘年削除三逆北清沙漠南定臺灣

功德之隆蟠天際地臣下依日月末光咸得榮分世職康熙四

十年十月

特諭大學士等凡官員本身効力自立官職者身故後應襲之人屬有廢疾遂停止襲職情殊可憫應停給全俸以每月錢糧支給俟其或生子別有應襲之人足克任使卽准替襲以示朝廷優恤世職之意

聖恩高厚至于如此迫我

世宗皇帝御極青海蕩平西藏底定

鴻休偉烈悉由廟算如神顧念師武臣力亦皆

錫以世職蓋

國家湛恩渥澤誠有加無已也稽古唐虞賞延于世漢唐
以來任子之法名臣多出其中我

朝世職與成周世祿相通每遇

慶典各加

恩進階尤爲

異數其間有才能特出之彥皆得與任使致身顯要卽緣事
斥革者世次未盡更許以別支承襲報功之典斯爲盛
矣近日

皇上恩旨准以精奇尼哈番爲子爵阿思哈尼哈番爲男爵
俱附入封爵表其自輕車都尉以下並按八旗世職次

第詳列于左作世職表惟雲騎尉止襲一次者無庸列敘焉

八旗宗人府年表序

周禮始設都宗人冢宗人以掌祀事漢立宗正所職漸廣歷代因之我

朝立制尤重宗親會典稱

國初于

篤恭殿前列署十爲諸王議政之所順治九年設宗人府以和碩親王或多羅郡王總領府事多羅貝勒爲左宗正固山貝子爲右宗正鎮國公或輔國公爲左右宗人

掌

皇族之屬籍以時修輯

玉牒紀載宗室子女嫡庶名封生卒婚嫁謚葬等事蓋自古有國家者宗室王公凡有委任並由特簡所宜職者宗人府而已且夫建官設職任以王公以理宗藩其事甚重任其事者不可以不志而王公爲八旗表率則志八旗者宜先志也茲特按年爲表列諸內閣部院大臣年表之前凡王公之賢且才者靖共厥位可攷見焉至府丞一員係屬漢缺不備著云

八旗統屬旗務大臣年表序

國家創業首建八旗其管旗大臣皆佐命元勲在股肱心膂之列者也至于大勲既集海宇乂安而八旗爲根本重地膺斯職者責任匪易是八旗大臣首宜表而出之矣粵稽

太祖高皇帝甲寅年初以滿洲四旗鑲爲八旗立八固山額眞統之每旗左右設梅勒額眞後改爲梅勒章京天聰九年

太宗文皇帝設蒙古八旗固山額眞梅勒章京各二崇德二年分烏真超哈爲兩旗四年又分爲四旗七年始編爲八設官與滿洲八旗同順治十七年

世祖章皇帝改固山額真漢文爲都統梅勒章京漢文爲副都統烏真超哈漢文爲漢軍至

世宗憲皇帝御極又改固山額真滿文爲固山昂邦

列祖相承務求盡善其內大臣護軍前鋒步軍各統領及內務府鑾儀衛等官亦各以時建設今敘八旗大臣以滿洲蒙古漢軍八旗都統副都統各旗爲一表而領侍衛內大臣及內大臣護軍統領前鋒統領步軍統領內務府總管鑾儀衛大臣共爲一表皆所以統屬八旗之專職也蓋志直省者必先表督撫志八旗者亦先表管旗大臣若衣之挈領綱之持綱也作八旗大臣表

八旗內閣大臣年表序

國家初設文館以處文學侍從之臣名其官曰榜式崇德元年始改文館爲內三院一曰內國史院二曰內秘書院三曰內弘文院設大學士學士順治元年兼用漢大學士二年又兼用漢學士嗣是內院之官不專屬于八旗然大學士學士並定有滿缺則志八旗者不得畧也漢缺又叅用漢軍則漢缺亦不得而畧也是年定內三院爲正二品衙門以翰林院官分隸稱曰內翰林國史院內翰林秘書院內翰林弘文院十五年九月改內三院爲

殿閣衙曰

中和殿保和殿文華殿武英殿文淵閣東閣各設大學士
學士大學士兼各部尚書銜學士兼禮部侍郎銜別設
翰林院于東長安門外以學士一員掌院事仍兼禮部
侍郎銜十八年七月復改內閣爲內三院裁翰林院官
康熙九年十月仍改爲

殿閣別設翰林院至于今不改粵稽內閣爲機務要地掌
宣

綸綍贊理庶政自

大慶箋奏史館總裁

寶璽冊誥勅命之用

壇廟祝版殿試讀卷一切大典禮莫不領其事爲百僚率先而

尤莫重于票擬

國家之制章奏必兼

國書繙繹對校毫釐千里非滿大學士莫能兼通滿漢文
義也至于票簽進呈

聖心或有裁酌未遽定者折其所票越日面

奏請

旨至期滿學士一人恭捧折簽諸疏逐一口宣節畧必心通
默識奏對明敏者乃無違誤則滿學士之任亦未易也

國家重熙累洽根于政本內閣大僚選賢而用諸臣依日月之末光宜得分榮竹帛爰攷自崇德以來滿洲及漢軍大學士學士按年備列爲八旗內閣大臣年表而翰林院滿學士及漢軍學士亦附見焉

八旗部院大臣年表序

國家初興創立八旗設十六大臣以理政事天聰五年初設六部每部以貝勒一人領其事設滿承政二員蒙古承政一員漢承政一員叅政八員漢承政卽烏真超哈人員也崇德三年七月增設都察院理藩院是年始定部院各設承政一員叅政二員停王貝勒領部院事

世祖章皇帝定都燕京改六部理藩院承政爲尙書叅政爲侍郎惟都察院仍舊稱不改是年增置漢侍郎及副僉都御史而八旗滿缺各有定員則志八旗者自當按年爲之表矣五年七月增六部漢尙書因置都察院漢左都御史而滿缺猶稱承政叅政十七年始改都察院滿承政爲左都御史滿叅政爲左副都御史滿漢官名至是始盡一先是順治七年增吏戶刑三部滿尙書各一員十年停止又六部初設蒙古侍郎一員順治元年裁歸滿缺禮部亦別設漢軍侍郎一員十五年裁歸漢缺又順治十六年始設

盛京戶工二部侍郎續設禮刑二部侍郎康熙三十年復設兵部侍郎

盛京五部侍郎初並用滿官雍正元年以後始參用漢官蓋部院八旗大臣員缺其制度可考見者如此當此位者責任綦重不得畧焉

本朝自

祖宗以來慎擇部院大臣滿洲及漢軍多起勲舊故六部理藩院之政事設施都察院之糾劾咸足以光輔

鴻業勸相

國家自建立部院百年以來名世爲生布列臺省遭逢

景運其克自樹立勲業爛然者固載諸列傳光于史冊而名器之重論定然後官位定然後祿則凡茲在位並屬崇班雖不能盡爲之傳例得表而出之以志八旗師師濟濟之美今謹稽舊籍按年備書爲八旗部院大臣年表覽旗籍人材之盛者得以考焉

八旗直省大臣年表序

國家統一區宇薄海內外同不臣服爰遣大臣分蒞直省用資彈壓蓋封疆之責寄焉

世祖章皇帝定鼎燕京以內大臣爲總管佐以梅勒章京二員
居守

盛京其餘因地制宜分撥

禁旅駐防天下于是防海防邊及腹心重地遣戍多者則以八旗大員領之逮

聖祖仁皇帝廟謨丕顯隨時損益

世宗憲皇帝保泰持盈水陸要衝綢繆大備考會典所載直省駐防官員分遣大臣者天津州都統一員奉天府將軍一員副都統一員錦州府副都統一員金州副都統一員熊岳副都統一員寧古塔烏喇等處將軍一員副都統一員黑龍江將軍一員副都統一員受渾副都統一員墨爾根副都統一員右玉縣將軍一員副都統一員

西安府將軍一員副都統四員寧夏府將軍一員副都
統二員成都府副都統一員廣州府將軍一員副都統
二員荊州府將軍一員副都統二員江寧府將軍一員
副都統二員京口將軍一員副都統四員杭州府將軍
一員副都統四員福州府將軍一員副都統二員雍正
七年又增設青州府將軍一員副都統一員建官之盛
庶越前古八旗大臣銜

命而往者慎固封守和輯軍民任綦重矣謹遵建設先後稽
其補用年月表而著之其奉裁各缺不載于會典者原
任姓名亦咸錄焉至于督撫爲監司守令之表率而提

鎮官則以統轄綠旗官兵我

國家立賢無方旗員與漢人參用惟山陝總督山西陝西
甘肅三巡撫昔年定爲滿缺今亦備稽其補用年月與
都統將軍等同爲直省大臣表其餘直省督撫提鎮凡
係八旗人員補授者並附列于後焉

八旗選舉表序

隋設進士之科以文取士追今千有餘歲雖諸科間設
未有能易進士者也

國家誕敷文教被于四海八旗多士近在輦轂漸摩涵濡
尤爲深厚天聰八年四月

太宗文皇帝命禮部考取通滿洲蒙古漢書文義者爲舉人取
中滿洲習滿書者剛林敦多惠滿洲習漢書者察不害
恩國泰漢人習滿書者宜成格漢人習漢書者齊國儒
朱燦然羅繡錦梁正大雷興馬國柱金柱王來用蒙古
習蒙古書者俄博特石岱蘇魯木共十六人俱
賜爲舉人各

賜衣一襲免四丁宴于禮部崇德三年八月

賜新中式舉人羅碩常雅胡邱阿濟格畢禮克圖王文奎蘇弘
祖楊方興曹京張大任于變龍等十名朝衣各一領授
半箇牛录章京品級各免人丁四名六年六月內三院

大學士范文程希福剛林等奏以清漢蒙古士人考取秀才並舉人秋七月

賜新中式舉人滿洲鄂貌圖赫德蒙古杜當漢人崔光前卞三元章于天卞爲鳳各緞朝衣一領當是時取士之額雖少而名臣多出其中順治八年六月禮部議准八旗科舉例凡遇應考年分鄉試取中滿洲五十名蒙古二十名烏真超哈五十名各衙門無頂帶筆帖式亦准應試滿洲蒙古識漢字者繙漢字文一篇不識漢字者作滿字文一篇烏真超哈文章篇數如漢人例會試取中滿洲二十五名蒙古十名烏真超哈二十五名各衙門他

赤哈哈番筆帖式哈番俱准應試滿洲蒙古識漢字者
繙漢字文一篇作文章一篇不識漢字者作滿字文二
篇烏真超哈文章篇數如漢人例八月上

皇太后尊號恩詔內一滿洲蒙古烏真超哈舉人于順治九年
會試原額取六十名今加額二十五名禮部言今科順
天鄉試取滿洲舉人五十名蒙古舉人二十名主考應
用滿洲內院禮部官一員烏真超哈舉人五十名聽漢
主考官閱卷又監生額數既加三十八名應增漢房考
官二員至烏真超哈文字本年鄉試明年會試第一場
書義二篇經義一篇如未通經者作書義三篇二場論

一篇三場策一道順治十一年鄉試十二年會試第一場書義三篇經義二篇二場論一篇判五條三場策三道順治十四年鄉試十五年會試第一場書義三篇經義四篇二場論一篇表一篇判五條三場策五道

詔如所議行又內三院會同禮部議准本年順天鄉試滿洲蒙古生員筆帖式應同一榜烏真超哈生員筆帖式漢生員監生應同一榜明年會試殿試俱照此例九年三月丙申策試滿洲蒙古貢士麻勒吉等己亥

賜滿洲蒙古

殿試貢士麻勒吉等五十人及烏真超哈漢人

殿試貢士鄒忠倚等三百九十七人進士及第出身有差
五月乙未授滿洲一甲一名進士麻勒吉爲內翰林弘
文院修撰一甲二名進士折庫納爲內翰林國史院編
修一甲三名進士巴海爲內翰林秘書院編修九月丁
丑選授滿洲進士饒冲阿吳爾戶魏羅渾宋蘇保蒙古
進士八達里塔必圖烏真超哈進士遲煌范承謨丁思
孔陳永命爲庶吉士同修撰麻勒吉等翰林院讀書十
二年三月戊申

賜一甲一名進士圖爾宸吏大成袍帽靴襪及諸進士折鈔銀
兩有差四月丁巳停選烏真超哈庶吉士壬戌選滿進

士董色烏大禪莫樂洪達爾布托必泰查漢等俱爲庶
吉士同滿漢一甲進士讀書庚辰授一甲進士圖爾宸
爲內翰林國史院修撰賈勤爲內翰林弘文院編修索
泰爲內翰林秘書院編修八月壬申

世祖章皇帝諭吏部曰前選庶吉士因烏真超哈進士久在旗
下已經習學滿洲規矩不必與選二甲進士洪士銘亦照此
例應選知州念係經畧輔臣洪士銘之子著以京官用三甲
進士耿効忠係靖南王耿繼茂之子亦著以京官用俱察照
應得職銜選授十三年八月丙申減考取滿洲舉人額十名
進士額五名蒙古舉人額五名進士額五名烏真超哈

舉人額五名十四年正月甲子停止八旗考試康熙二年以八旗生員無上進之階八月乙巳復行滿洲蒙古漢軍鄉試以內弘文院學士羅敏內國史院侍讀學士蘇勒木禮部左侍郎布顏爲滿文主考官九月辛未取中舉人滿洲齊爾保等二十一名蒙古布顏等十七名漢軍姚啟聖等一百一十八名咨送吏部錄用六年九月復

命滿洲蒙古漢軍與漢人同場一例考試從御史徐誥武請也八年九月乙卯定滿洲蒙古漢軍鄉會試額數順天鄉試滿洲蒙古編滿字號共取中十名漢軍編合字號取

中十名會試滿字號取中四名合字號取中二名先是漢軍與漢人同試舉人外取副榜五人十一年禮部題准滿洲蒙古亦照漢軍額取副榜十五年十月從禮部請停八旗鄉會試至二十九年復舉行三十二年六月禮部覆准國子監祭酒吳苑疏言八旗之人學習制藝者日多而中式之額太少請加名數滿洲蒙古增六名共取中十六名漢軍增三名共取中八名會試滿洲蒙古增二名共取中六名漢軍增一名共取中三名三十五年七月廣八旗滿洲蒙古漢軍鄉試解額滿洲蒙古四名漢軍二名四十一年八月增順天鄉試中額八旗

滿洲蒙古三名漢軍一名從順天府府尹錢晉錫請也
比

聖祖仁皇帝人道化成人文日新月盛會試中額臨時

欽定不限成額

世宗憲皇帝御字加意人材八旗會試之額每科遞增中式之
士館職而外復加揀選而迴避之卷下第之士亦蒐羅
不遺雍正元年正月十六日總理事務王大臣傳奉

諭旨八旗滿洲等照常考試漢字秀才舉人進士外在滿洲等
繙譯武藝亦俱屬緊要應將滿洲另繙滿文考試秀才舉人
進士及武秀才舉人進士之處爾等會同該部作何考試額

數多少等處定議具奏尋議覆制科取士乃

國家掄才盛典我

皇上臨御之初以作養人才爲首務于八旗滿洲等照常考試漢文秀才舉人進士外將滿洲等文能繙譯武能技勇者另行定額考取秀才舉人進士此誠我

皇上廣育人才裨益治化之盛心也嗣後八旗滿洲等亦照漢軍考取武秀才舉人進士之例秀才取四十名舉人取二十名進士取四名滿洲等考取武秀才舉人進士外場停其舞刀掇石俱令射馬步箭有能拉硬弓馬上熟練樣式好者令其入內場另編滿字號照漢軍例考

試其

殿試亦照此例奉

旨依議二年十一月禮部奏請考試繙譯舉人奉

旨考試繙譯舉人卽作三場考試亦無非繙譯作一次考好一日一夜量其所能奏章一道或四書或五經酌量出一題目考試其優劣便可見此考試並不作漢文字不必派漢大人再考試舉子俱係八旗內人其繙譯好者衆所共知卽字跡亦最易認伊等試卷應行謄錄其謄錄着于六部各衙門善書之筆帖式內酌量足用選取令其謄寫其堪中式之卷挑選呈覽時再行定其額數仍選備卷呈覽分房及看守巡察

官員俱照文鄉試例派用

聖諭周詳旁求之典備至蓋文治之盛煥乎有章而八旗首著
尤爲彬彬矣謹按各年列科別以八旗作選舉表

八旗勲臣傳序

周禮稱王功曰勲戰功曰多然考之載籍王功必曰大
勲其以多稱戰功惟見魏武帝薦荀彧表而已國語稱
克潞之役魏顆卻秦軍止杜回其勲銘于景鐘是戰功
亦曰勲也尙書載大禹誓師之辭曰肆予以爾衆士奉
辭伐罪爾尙一乃心力其克有勲是戰功曰勲下及于
軍士也

三朝國史奏定功臣凡例官未至大臣以軍功得世職者惟阿
思哈尼哈番以上乃得請

旨立傳顧阿達哈哈番以下世職並出戰功功有大小而効
力疆場敵王所愾其爲勲勞則一志書之體視

國史稍寬未可廢也用稽八旗世職

勅書凡官未至大臣以戰功得授阿達哈哈番以下世職者
並依

勅書開載勲勞別立爲勲臣傳其有功績散見于

實錄史書者亦附入焉

八旗忠烈傳序

忠烈之性上天賦畀之恒而八旗爲尤著益

國家教化之深恩德之厚近光之士較逖聽之衆尤爲親切故激厲奮發而至于斯也我

朝自

祖宗以來待臣民

恩意隆洽至于軍功卹賞尤厚故人以偷生異懦爲恥而以見危授命爲榮

世宗憲皇帝御極尤加意致命諸臣雍正二年十月

特旨諭九卿詹事科道言朕惟周禮有司勲之官凡有功者書

銘太常祭于大烝祭法曰以死勤事則祀之凡以崇德報

功風勵忠節也我

太祖高皇帝肇造鴻圖

太宗文皇帝式廓區夏

世祖章皇帝奄有萬邦自創業以至定鼎將帥之臣致命立功者不少

聖祖仁皇帝臨御六十一年中間殲滅三逆永清朔漠以及平定西藏臺灣雖天戈所指如疾風振槁而師武臣之捐軀馬革及守土官之見危授命者所在多有邇者青海蕩平西域効順然自用兵以來將士奮勇前驅亦有歿于行陣者此皆盡忠報國之臣朕甚嘉之亦甚憫之當于京城建

立祠廟春秋妥侑世世血食其偏裨士卒力戰敵愾舍生
取義者亦附列左右以褒崇大節揚表芳徽俾遠近觀聽
勃然生忠義之心于治道亦有裨益仍令翰林官纂其籍
貫事跡各立爲傳彙成一編垂諸永久爾等悉心詳議其
奏大哉

王言思意之隆襍以加矣然歷考彙報名冊則籍隸八旗者
殆當其半豈非化行自近漸被

聖教爲尤深哉今纂修八旗志書凡王公大臣功業宏偉不
止于致命一節者循倣史例各立大傳列在名臣其官
秩稍卑別無建樹者並稽其慷慨從容臨難不苟之蹟

作忠烈傳

八旗循吏傳序

史記始立循吏傳循之爲言爾雅以率循釋之廣韻則訓以善蓋爲奉法乃成善政耳故曰奉職循理可以爲治我

國家崇飭吏事宏布紀綱自

祖宗以來壹以愛民爲主守土之官奉行唯謹善政布于海宇
逾百年矣攷

本朝外吏藩臬大員滿漢叅用道府州縣則漢軍人員爲多故旗員紀名宦者所在皆有蓋

國家吏治之醇實八旗人物之盛也今按直省咨冊所載
旗員名宦自駐防將軍總督巡撫都御史提督鎮守總
兵官諸封疆大臣仍入于名臣列傳外其司道府州縣
等官各採其政蹟作循吏傳至于武職副將以下有功
于地方者亦附見焉

八旗儒林傳序

古今道術之傳作者爲聖述者爲明自伏羲氏畫易卦
其臣史皇作書契助啟文明之治二帝三王以來百官
以治萬民以察至孔子承道統始以儒術教天下後世
而顏孟等承其傳益既有作者之聖亦必有述者之明

也我

太祖高皇帝肇興帝業特制國書以教臣民清漢文並行于中外上古作者之聖繼天立極之盛復見于今日矣至述者之明有助于制作定世之大者當時名臣大海榜式額爾德尼榜式等並能仰承

太祖聖意助制文字詞是四書五經以次演譯東連元集西被流沙自古聲教不及之地莫不知有二帝三王之書而希福榜式等翻譯遼金元三史法前王師近代制作大備蓋儒術至是益昌無遠弗届亦無微弗著豈非帝王之盛事哉是用採摭

國初以來諸榜式事實撰爲儒林傳其列在旗籍以文章侍從有學行見知于

九重者亦附見其後焉榜式者猶漢人言文儒云

八旗孝義傳序

國家創業東方風氣淳古渾渾噩噩比于三五之盛人敦實行不務榮名忠孝節義視爲當然至于子弟至性卓然可以追古篤行之士者未嘗震而矜之謂可以表當時傳後世也順治九年十一月甲申

詔諸王宗室內有孝友義順者聽宗人府核實具奏禮部卽行照例旌表十年五月定旌表宗室節孝例康熙三十七年十

二月戊午我

聖祖仁皇帝特諭大學士等言興起敎化鼓舞品行必以孝道爲先節婦應加旌表孝子尤宜褒獎八旗中豈無孝子乎其居官殷實者行孝乃分內事耳貧人克盡孝道誠爲非易如有身處貧寒能盡孝于父母者察明奏聞

聖諭諄切如此然八旗大臣比戶而稽莫不欣然退讓其宗族長老亦以爲人子庸行未敢舉以應

詔益風俗之淳猶東方也迨我

世宗憲皇帝登極尤以崇獎孝義爲重

恩詔特言旌表節義給銀建坊民間往往視爲具文未曾建

立恐日久仍至泯沒不能使民間有所觀感著于地方公所設立祠宇將前後忠孝節義之人俱標姓氏于其中已故者則設牌面於祠中祭祀用以闡幽光而垂永久著該部議奏

殊恩曠典千載而一時者也尋經禮臣議覆請于八旗左右翼擇地各建二祠一爲忠義孝悌之祠立石碑一道將前後忠義孝悌之人刊刻姓氏于其上已故者立牌位于祠中一爲節孝之祠門外建大坊一座將前後節孝婦女標題姓氏于其上已故者設牌位于祠中每年春秋二次致祭交與宛大二縣其建立祠宇碑坊交與工

部營造

臣

部于每年二月內將前一歲八旗送到孝行

節義疏題請

旌表以後永爲定例其建坊銀兩嗣後應行停給卽日奉

旨孝行節義建立牌坊年久毀壞遂至湮沒今欲設立祠宇

特爲昭垂久遠之意並非欲節省錢糧部議建立祠宇停

給建坊銀兩不合建坊銀兩仍著給與餘依議蓋

聖意之加恩于忠孝節義者深厚如此然八旗人士歆然退

讓如昔節烈婦女舉報甚多而舉孝子者僅三數人今

敬稽

實錄所載及各旗冊籍附見孝子義士採錄十數人備存梗概

作孝義傳

八旗烈女傳序

王化莫先于閨門故關雎鵲巢以爲風始風由近以及遠詩小序釋二南謂王化自北而南八旗則

國朝之二南也江漢汝墳固莫能或之先也每稽歲終彙奏婦女節烈則

旌門之興莫盛于八旗而從殉者尤多

聖祖仁皇帝好生之德始詔停殉夫者

旌典而八旗以殉夫報部者比比而是則

聖化漸摩已深節烈成風不以

恩例之得失移其志也何其盛哉雍正元年

恩詔言旌表節義乃彰善大典每見直省地方有力之家尙能上達而鄉村貧窶之人則多湮沒無聞深可憫惻著督撫學臣及有司遍加採訪務使寒苦守節之家同霑恩澤至節婦年逾四十而身故計其守節已歷十五載以上者亦應酌量旌獎

殊恩異數古未有也載稽漢劉向氏曾傳列女凡賢淑明慧者皆得與焉不止于節烈顧婦行不踰閭非節烈無由自見今八旗節烈婦女具于

實錄史書及部冊所存八旗所保送者備載不遺而以宗室王

公妃夫人冠于篇首其有賢淑之德或誕生

聖后或保育

聖主得受

祿惠榮特異者亦附見王公妃夫人之後合爲列女傳庶
八旗閨門之化之盛得備攷焉

穆堂別藁卷之二十八

臨川 李紱 巨來

傳一

大學士白公家傳

康熙五十四年余任翰林院侍講學士尋克

日講起居注官聞

聖祖仁皇帝天語數天下清官若大學士張文端公鵬翮尙書

趙恭毅公申喬大學士蕭公永藻等僅六七人時皆任
封疆大臣大學士白公方爲按察使名亦與焉心竊嚮
往之頗聞公亦知有余然未及相識也五十六年余往

典雲南鄉試公由貴州還

朝候補布政使相遇于辰沅驛次傾蓋而語若平生歡是役往還必經貴州訪公政績益心服焉是歲公卽來撫江西又二年余奉

命祀南海道過里門因得繼見兼悉公在江西功德又三年公入爲尙書余亦遷副都御史追隨日親比公以大學士予告家居余外任督撫內轉工部旋落職纂修書局與公不相見者六七年公年踰七十余亦且六十矣往昔愛公奏疏名言碩畫咸有裨

國計民生嘗勸公付梓俾來者知所法公謙讓未遑也屬

公偶來相過因徐理前說索得公章奏十之二三遂撰
次成篇爲公家傳付公子藏弄異時修信史者得採撫
焉公名潛字近微漢軍鑲白旗人先世仕明開衛遼陽
因于蓋平縣創立白家寨聚族以居天命六年
國家盡有遼東之地公會祖諱文達歸命

本朝始隸旗籍祖諱承舉從

龍人關遂居京師考諱允明以人材舉積軍功官至都督僉
事駐防廣東協領晉階榮祿大夫自公會祖至考並以
公貴贈光祿大夫文華殿大學士兼兵部尙書妣皆贈
一品夫人公生而沉靜外晦內明讀書窮理達當世之

務尤熟

國書口誦手揮有若性成然謙謹未嘗以才智傲人終日
欽欽寡言笑謝交游泊如也康熙二十三年考授內閣
中書歷典籍遷理藩院主事再遷內閣侍讀所至勤于
職事以廉能稱三十八年出爲福建糧驛道按察使僉
事四十二年以父艱歸服闋補分巡山東登萊青道四
十八年

計典巡撫蔣公陳錫特疏

題薦四十九年轉貴州布政司叅議分守貴東道兼督理
糧驛時巡撫劉公蔭樞方嚴慎許可特器重公五十三

年貴州按察使缺人劉公具劄子薦公卽奉

聖祖仁皇帝俞旨照所請補授公念臬司爲全屬民命所關以理冤直枉爲已任初自京師引

見回任所途遇二生愬其妹爲祖姑毆死貴筑知縣諱理人命事以自經論恐二生上控併詳請褫其衣頂公委官驗審果毆死爲平反其獄二生得免褫詰貴知縣以幕客不明自解遂執其幕客遞回原籍自是所屬有司無敢有枉撓不當者五十四年冬十二月

聖祖特諭九卿貴州按察使白潢居官甚好操守亦好爾等知之否在

廷諸臣僉云居官果好操守廉潔明年二月遂奉

特旨補授湖廣布政使司布政使未及赴任適貴州巡撫劉公

奉

命往甘涼口外閱視西師三月遂

命公護理貴州巡撫印務湖廣布政使開缺另補時公已兩任
貴州熟悉風土旣權院事日以寧輯邊疆爲務軍民利
病次第興除貴州二大患其一爲兵米黔地山多田少
粒食甚艱各鎮協兵丁月米凡額徵米少者例于米多
州縣撥給旋以山路崎嶇領運艱難將所撥之米改徵
折色給兵自買後又以徵給米折低昂無定議于秋成

後令應撥應領之州縣營協各報時值照數徵給並經
從前督撫諸臣具疏

題定然應領米折銀兩每年秋成定價具

題後州縣始遵守徵收秋冬應領米折銀兩每延至次年
春夏始能領回逾時米貴仍不敷糴價兵丁守候日久
又悞差操公因疏陳其弊言兵丁月米乃計日授食之
需按月支給庶免枵腹若俟折定具

題徵收支領必至愆期請各名州縣折徵價值催解道庫
順便給領但州縣折徵銀兩歲內勢難完解而道庫又
無項可支查此項米折約計一萬餘兩臣仰體

皇上優卹兵丁至意通融酌劑每年秋收折定具

題之內于藩庫內預借移交道庫支給乘時糴買仍飭各州縣將折徵米價照數徵解道庫彙齊於

奏銷前移解藩庫還項一轉移間庫帑無虧兵丁可飽疏下部議悉依所請黔兵歡呼曰吾儕皆食白公德也其一爲驛夫貴州驛遞每驛額設馬四十五疋每站額設夫一百名應付一切火牌勘合差使此定例也此外又有相沿陋例或院司道府私檄謂之便牌有用夫至百名以外者派令鄉夫答應名曰大水夫此名旣立派弊叢生貴東西管驛各官有勘合火牌公差一檄勒令鄉

夫荅應小民隱忍供役又其甚者因鄉夫易取凡大小衙門經過仕宦賓客到站需夫悉徇情濫應每月用夫數百名至一二千名農者不得耕耘居者不得休息公自初任驛道卽加裁抑顧勢力止及屬員他莫能禁旣權院事遂徹底革除務絕根株勒示全屬驛館凡便脾大水夫永行禁止于是民困大蘇若出湯火軍民旣安留心厚風俗興教化而黔地僻遠士大夫甚少無可商榷聞有通籍者宦成後多寄籍他土不歸故鄉公因疏言黔處極邊地方陋僻蒙我

皇上仁育義正培養五十餘年生聚漸繁人文蔚起登仕籍

者殆不乏人宦紳爲士民之望多一宦紳卽多一模範薰陶鼓舞不難漸增文物之盛乃黔省鄉紳一經出仕憎本鄉磽瘠往往就業他土畱住不歸使人皆效尤相率遠徙則畱住黔地者止此椎魯窮民欲求地方饒裕風土醇美豈可得乎查奉天四川宦紳定有勒令回籍之例請援此例將黔省宦紳與名列科第者嗣後不得流居外鄉其現畱外省者勒限回籍庶士民共覩儀型獲觀摩之功裨益遐陬實匪淺鮮疏入得請於是黔地衣冠日盛黔人初疑不便久乃思公功德焉明年巡撫劉公目軍前回任公赴京候補中途聞

命授江西布政使因疾趨入京至熱河

行在

聖祖召對屏左右詢問各處地方情形及人才賢否良久

天顏霽悅隨奉

旨陞授都察院右副都御史巡撫江西越日

辭

賜御書誠信開府四字扁額一幅五字七字對句各一聯鞍馬
等物公感激

隆恩愈圖報效及抵江西卽疏除闔屬節禮漕規贛湖二關舊
例約共五六萬兩止欽遵

諭旨畱平規一釐銀爲養廉費於是屬吏肅然毋敢以苞苴
行者江西火耗往歲約加二有餘甚者加至三四不等
公以革除規禮本以裕民非以肥官州縣重徵宜禁因
密

奏各屬火耗止許加一有不率者立加叅處連劾都昌宜
黃二令宣示闔屬於是所在祇遵江西轉漕例以冬兌
而江西秋熟常遲至十月有司恐致貽悞多鞭朴催督
公爲設法許碾積穀預兌秋成後收穀還項推陳出新
官民兩便江西山僻州縣距水次遠者舊例許折銀官
爲代買折價多浮歲因以爲利其貪吏多收斛面什收

七而額已敷于是近水次者亦令折銀江西米價素平石不過七八錢折價常至加倍公察其弊爲定價石八錢其轉漕之邑漕耗明加暗加諸弊悉禁革之南昌等十府例食淮鹽舊時食鹽一包價一錢有零其後歲加湧貴至一錢七八分公具劄子

奏定價一錢一分俾商僧盡一遵守不得意爲低昂自是民無食淡之苦九江權關原設九河府城從前督撫疏請改設湖口縣截鄱陽湖南船漏稅之弊歲可增稅銀若干其實湖口原設巡摺背役無得漏者特欲借此邀功其所增則皆權官向時匿而私之者耳然自移關湖

口無泊船之所歲壞船百計溺人千計公

陛辭時蒙

聖祖面諭湖口關泊船甚險爾須留心公既抵任以是年十一

月親率按察使及饒九南道等往閱勘既抵湖口縣周
閱地形邑城背山面江左右有石鐘山巉巖夾峙直插
江中此地設關商船必停泊候驗而泊船處止虹橋一
港逼在鐘山下夏秋水漲僅容小船一二百艘及冬春
水涸不得不沿江灣泊遇江風陡作撞觸岸石損舟無
算且水涸之時江船到關報稅不能直截徑行必由梅
家洲嘴轉行十有餘里來時卽順風去必風逆上下挽

駕甚艱及至水漲則湖江交匯于虹橋港口兩相衝激
洶湧異常少有微風卽多不測再四籌畫疏請照原任
兩江督臣阿山所奏比照江南海關之例於九江湖口
二處分收稅課商船穩泊

國課仍可無虧格部議不行因再具疏言湖口關右里許
山勢開闊內有一武曲港可容千艘但夏秋有水冬春
易涸必大爲挑濬方能四季容舟今酌量自江邊起至
港塘口止共長九十三丈寬八丈至十二丈不等牽深
二丈至四丈不等港塘長一百丈寬五十五丈深三丈
至臨大江港口左右建草壩二道以阻淤沙其壩各長

四十丈有零牽高二丈有零外加排椿以固壩根則港水不涸泊船無虞至挑濬工料隨經委官估計約費銀二萬六千餘兩其興工日期必俟次年江水稍定之十月起至十一十二正二月等卽可完工所需工料銀兩臣率同司道府縣于俸工銀內公捐併繪湖口圖一張武曲港圖一張恭呈

御覽疏入

報可次年遂大加修鑿舟楫始免覆溺商旅相慶釀金建亭港上以祝

聖祖萬壽而立公生祠于下紀公功焉江西會城西南有袁贛

二江北至臨江府地方合流下注春夏水發往往沖決隄岸浸漫田土臨江府北舊有土橋老隄逼近江流保護清江豐城高安三縣田廬自康熙四十年水決未修至五十二年江水大發決處更加沖激中一段長二里餘竟成深潭近隄之田水沖沙壅已爲廢地離隄遠者餘波所及廣四十餘里長三十里計壞田千五百餘頃公抵任後親臨相度將應築情形具劄子

奏明一面捐俸遴官于十月興工聞民間父老言隄有怪物遇風雨輒昂起隄隨以壞公祭而後築明年四月工竣九月復親至工所查閱各邨庄父老子弟扶攜瞻拜

咸稱十八年來地不得耕屋不得居邱墓溺漂今年隄
基新築春季麥菜有收入夏早稻豐熟現今晚稻登場
又是十分收成約計今年稻麥比往年可多收四十餘
萬石家無昏墊屋有葢藏向所有怪物亦不復見熙熙
皞皞咸頌

皇仁公以此隄既係民生休戚時厯
睿慮今日擊小民欣喜情形遂繕疏

奏請爲久遠之計言土橋隄決一十八年未曾修築今隄
工告成不若責令地方官加謹保固必致仍前因循以
臣愚見似應著爲定例責令地方官保固倘有沖決該

府縣各罰俸一年停其陞轉賠修完日開復如布政司
徇庇不揭巡撫隱諱不叅一併議處庶隄埂長固而民
生永無水患疏下部覆如所請今大學士高安朱公軾
時方巡撫浙江特撰記貽其鄉黨勒石隄上以記其事
民懷其德名隄曰白公隄云先是康熙五十六年戶部
因內府商人王綱明虧欠帑銀據綱明呈請戶部

題准將江南湖廣浙江江西福建五省營驛應補馬匹交
與王綱明承辦各省差人往張家口領馬江南每馬一
匹價銀一十七兩五錢內以五兩五錢作領馬路費其
十二兩以九兩作王綱明馬價以三兩代王綱明補庫

江西各驛每歲應領馬六百五十二匹五十七年分照數領回中途倒斃馬三百四十五匹五十八年分照數領回中途倒斃馬五百五十六匹並將領馬官叅處公以倒斃馬過多雖由領馬之官喂養失調似亦因路遠給發愆期又馬匹未能足五六分廕壯各營驛又咸稱領馬倒斃而差操又不敢悞不得不就近買補是以一馬而用兩馬之價實爲賠累遂據辭入告每馬扣銀三兩代王綱明補庫其應領馬匹聽其就近購買上無負於

國帑下無悞於差操有裨營驛實非淺鮮此事先經臺臣

嚴君開泉福浙督臣滿公保條陳變通領馬之法俗于部議公以身受

聖祖簡畀重任凡有裨益地方之事不敢以部議不准遂因循緘默先繕密劄恭請

聖訓蒙

聖祖俞允具題下部覆奏如所請行五省之困頓蘇是時海宇久安催科忌緩倉庫不無虧耗

朝廷以錢糧爲國計所關宜善稽查之法令督撫各臣所見公因疏言江西虧空現在照例承追者共二十一案內在本省虧空查追者八案從外省虧空發回本籍查變

家產及咨移任所查追者十三案並嚴飭各屬勒限追完但查通省錢糧藩庫應巡撫盤查道庫應藩司盤查自當竭力稽察以盡職守惟州縣倉庫例應知府盤查往往不免于虧空者總由知府平時不無需索臨事遂多顧忌知府爲州縣切近之上司其倉庫唯知府知之最確亦惟知府制之差易惟嚴責知府將所屬倉庫按季盤查庫銀勒令隨徵隨解米穀務須實貯在倉季終出具盤查各屬並無虧空印結送司存案若出結後未逾兩月州縣有以虧空發覺者知府雖經揭報仍以捏結附叅併令分賠庶幾察密而虧空少再臣查定例凡

叅尋爛倉穀者革職畱任限年賠補全完卽予開復故
叅霉爛倉穀者雖多皆能于限內全完臣請嗣後以銀
穀虧空

題叅者革職解任一面嚴審侵那一面勒限一年賠補能
將所虧空銀穀於限內全完者將審案註銷准領咨赴
部另補如不能完卽于一年限滿之日將侵那情罪具
題交承追官照新例嚴追二限不完卽按原擬罪名發落
如此則去任者知功名尙可瓦全必竭力以圖完補而
在任者知虧空斷難逃罪自畏懼而不敢侵那至若知
府分賠亦請革職畱任限一年賠補如限內不完始解

任催追賠完仍于開復則知府分賠亦必不敢懈玩矣
又念承追之官亦當有勸懲之法因請定承追處分言
臣查承追虧空初追不可不嚴盡虧空欠贓之人去官
未久則財產未盡消費及此時竭力催追使之不得隱
匿詭寄必有追出完頂者初追三叅宜照部定新例遵
行但承追虧空不定分數則完一二分與完八九分無
異何以示勸懲而別勤惰請將年限仍遵部定三叅而
每限定以分數其一千兩以下者遵照新例叅處外一
千兩至五千兩每年以三分三釐爲率如部文到日一
年限內能全完者准加一級止照初限分數追完者免

其議處不及分數者罰俸一年再限一年若能全完者
及併完一二限分數者免其議處完不及分數者降一
級畱任再限一年全完者准其開復如仍不全完照例
降調若虧案至五千兩以上則數愈多而追愈難似應
破格獎勵有能于一年限內追完五千兩以上者准加
二級追完一萬兩以上者准加三級追完一萬五千兩
以上者准加四級追完二萬兩以上者不論年俸以應
陞之缺卽行陞用如此則承追之員自必踴躍急公不
敢畏難退阻似與虧空錢糧不無小補二疏入與直省
督撫所陳並下部議如公所請者十得七八焉公又念

錢糧而外刑名爲重刑名之中命盜爲重江西盜案少
命案多計蒞任一年以命案

題叅者六十餘事其實假命居半總由命案初出州縣不
卽驗明必待逾限

題叅一經叅奏後雖審係假命亦不能中止以至一年之
內命案纍纍因嚴立府縣審詳限期并計路程遠近以
立解犯日期違則嚴拘書吏重處轅門日事筆札略不
寬假於是吏役玩愒者漸知畏懼如限審詳假命俱可
外結次年承審叅遲延者止一事而命案減其大半公
在江西朝夕思所以利民者纖悉必周南昌饒州吉安

撫州四府舊有落地稅共銀一千三百兩零各設稅課使司其事常侵漁徵至數倍商民病之公倡率司道捐俸錢代爲解納停止抽收四府人民歌頌焉江西人文往昔號稱極盛近稍靡公特爲振興修豫章書院拔十三郡名諸生肄業其中延師講習豐其廩餼復奏請

聖祖御書扁額蒙賜章水文淵四字

天語商皇士氣愈奮江西解額舊多于湖廣浙江後二省以督撫之請反溢于江西公爲疏請言江西歷稱理學奧區人材淵藪自唐宋元明文章甲於海內從前科第之盛亦遠盛于浙楚所以鄉試中式舊額浙江一百七名湖

廣一百六名而江西一百十三名迨順治庚子科題定減額浙江五十四名湖廣五十三名而江西五十七名至康熙丙子科奉

旨增額浙江七十一名湖廣七十名而江西七十五名是歷來議減議增中額俱多于浙楚誠以江西人文不特顏浙江實遠勝于三楚也自康熙四十一年壬午科浙江以撫臣趙申喬題請湖廣以督臣郭琇題請均照江南中額蒙

恩一體加增至八十三名而江西以未經題請仍中七十五名反出浙楚之下至康熙五十年辛卯科欽奉

特旨加增直省中額于五分之一中增加一分浙楚增十六名
至九十九名江西增十五名至九十名比浙楚實少九
名是江西人文獨盛而中額反少難免遺珠之慮矧歷
年以來蒙我

皇上右文重道加意作人鹿洞驚湖頻頒

宸翰豫章書院復蒙

恩賜御書多士奮興盛于疇昔近科士子多至一萬二千餘
人與浙楚等而中式額不得比于浙楚士子環擁臣署
請

題廣額合無仰懇

皇恩將江西鄉試中額比照浙楚一例取中副榜亦循例並
增則多士益踴躍于功名而

聖朝文教之隆遠軼唐虞三代上矣等奉

聖祖恩旨下部議覆增中九名與浙楚合同今文風日上實公
振興之力也公自秉節江西凡有章

奏輒蒙

溫旨獎諭賞資稠疊五十八年差人至熱河恭請

聖安蒙

賜御書易經上繫第五章扇一握內造御 六種併

勅免謝公念受

恩日重封疆所任匪輕而年齒就衰疾病時作疏請解巡撫任
願就閒散京職尊奉

俞旨以戶部右侍郎徵用時值十三郡士子應鄉試入三場之
月公方坐龍門按冊點名而部報適至諸生譁然謂公
不可失也咸罷考不肯入場蠶擁督學衙門呈請代疏
題畱公分遣僚屬號召親加勸諭而萬二千人無一人應
名入場者必俟學使拜疏然後應試遂誤定期至十五
日始入三場然學使實拜他疏未敢代請公亦於榜後
入都

陞見

聖祖天顏和悅謂爾在江西聲名甚好所開武昌港一年免死
數百人爾身尙健何爲辭巡撫之任旋陞兵部尙書時康熙
五十有九年十一月也公旣總中樞考核戎政見選用
積滯思酌爲疏通之法六十一年五月因條陳三事一
直省營千總向例六年保送

皇上親加考試擇其中尤健壯者官京食俸遇缺補用至五
十九年復遵

上諭千總歷俸三年亦令保送仰見我

皇上于微弁中有可用之材亦不忍遺棄現今蒙

皇上親試揀選留京食俸候缺者三百二十餘人保送到部

候引

見者又有一百餘人嗣後源源保送人數日多查直省守備
共有九百四十五缺除應題補三百三十八缺之外其
應歸月選者六百零七缺此項揀選千總必得雙月所
出守備之缺方能與武進士武舉及各項捐納人員分
班補用故缺少人多補用遲滯以

皇上親試揀選之人正當乘其健壯効力豈可令守候無期
坐歎衰邁反使歷俸未久之千總得以題補臣等請將
揀選千總按名坐補省分計缺之多寡照發一半交督
撫提鎮遇坐名題補之缺卽行題補將次用完再請續

發其未發畱京者仍歸臣部月選補用庶英銳之材得
以及時効用而營伍亦實有裨益一查八旗文進士舉
人俱有選用之例而八旗漢軍武進士武舉自康熙五
十年欽遵

上諭開科考取已歷五科並未議及作何選用查定例漢武
舉俟揀選後遇門衛千總缺出分班推用今臣等請嗣
後凡遇揀選之處將漢軍武舉與漢武舉一體揀選註
冊挨次推用再查漢武進士定例前一半以營守備用
後一半以衛守備用嗣後亦將漢軍武進士照伊科分
一體揀選庶八旗武科均得及時効力一查臣部武進

士選法前一半以營守備用後一半以衛守備用輪至班次各連用二名至二十七年因候選衛守備人多缺少壅滯不均經臣部題准除衛守備之缺仍將候選衛守備之人推補外其營守備員缺將候選營缺之武進士與候選衛缺之武進士相間推補但近年以來營守備缺出經各省督撫提鎮題補者多歸月選者少以致前一半之武進士用至四十五年後一半之武進士用至四十八年是在後者反速而在前者反遲矣臣請嗣後雙月所出營缺停其與選衛缺之人相間推補仍照從前之例營衛守備之缺各歸本班連用武進士二名

庶選補無偏遲之虞尋經九卿議覆無論各省應否題補地方將揀選千總照缺之多寡遇該省守備缺出令該督撫提鎮挨名題補共分發三百三十七員而壅滯爲之立通其他隨事釐正不爲威怵不爲利疚本部會同館舊額設馬一千餘匹例應歲領草料價銀若干兩有馬頭呈憑勢要請預領銀二十萬兩按年扣銷各堂司俱以爲可行公獨持不可復噉以厚利挾以危語公屹然不爲動卒得不行車駕司舊有奏銷飯銀尙書應得一千二百兩公以兵部衙舍傾塌悉捐此銀修理煥然一新在部再葺

聖祖皇帝眷注愈隆公亦竭力圖報遇九卿會議不爲阿隨時
戶工二部錢局鼓鑄銅劬因銅商虧帑派于八省辦解
部定銅價原無不敷第派買之地俱不產銅必就洋船
買送而東洋各船俱由江南浙江二海關驗明收口是
以八省辦銅之官齊集蘇杭二府守候奸商乘機囤積
擡價捐勒承辦官各顧考成互相爭買以致銅價高昂
賠墊甚苦猶不能敷有就地丁加派累及于民者六十
一年江南海關監督劉保住疏請以八省辦解之銅專
歸江海一關承辦疏下九卿會議余時以副都御史與
議謂八省無銅而派令承辦勢连力絀欠銅至三十餘

萬叅官至八十餘員攤派地丁錢糧累及小民者已五
省矣且今日惟恃洋銅自當令有銅處承辦不當責之
無銅之地法窮則變宜如所請而向來錢局陋例甚多
交銅有費承辦遲延者免叅有費八省承買則官愈多
費愈重而得陋利愈多于是戶工二部督理寶泉寶源
二局者力持不可謂監督微員以收稅之官而承辦八
省四百四十餘萬觔之銅責任過重且關差按年更換
必致呼應不靈爭二日不決第三日公至謂何不以開
歸併巡撫因別爲後議言鼓鑄一事屢厯

聖懷臣再四思維卽就劉保住所請銅歸開辦疏內等一變

通之法以期永遠可行莫若將江浙二海關照天津臨
清等關併歸巡撫兼理之例卽歸併于江南浙江兩巡
撫兼管並令辦解銅餉若關課有虧銅餉遲悞卽將兩
巡撫從重議處所贏餘

奏明充餉其兩巡撫分辦銅數行文該撫酌定報部至六
十年以前之銅八省已經委員領銀採辦仍令八省督
撫速催解部其六十一年以後之銅歸併江浙兩巡撫
辦解余亦欣然署名列上尋奉

俞旨白潢等所議是照後議行公慮事周詳明決類如此是年
秋帶武官至熱河引

見特蒙

聖祖召入避暑山莊遊玩併

賜宴及珪瑯攢盒珪瑯碗各一十一月

聖祖龍馭上賓

今上嗣承大統

特命協理內閣大學士事務十二月遂奉

旨實授文華殿大學士兼兵部尚書公隨具劄子懇辭奉

御批卿乃

先帝信用大臣朕所素知另有旨了不必固辭又奉

上諭朕嗣紹丕基夙夜祇惕唯恐負

皇考付託之重念內閣重地贊襄匪輕特命爾入閣辦事爾具摺懇辭朕素知爾居官操守甚好巡撫江西時綏輯地方甚有裨益及任兵部尙書清勤恪慎

皇考每加優獎今朕以機務重大資爾料理爾可卽遵旨供職不必固辭兵部事亦緊要仍着爾兼管特諭公感

皇上知遇之恩旣隆且重不敢再辭始勉就職守而兵部選法尙有未善者初九卿議定各省守備缺出無論應否題補地方盡歸于分發千總題補以致雙月之武進士六班人員及單月之小銜守備竟無銓選之期雍正元年二月公復疏請變通言臣部陞選營守備一項雙月

缺出則歸之到部人員輪班銓選裁缺一班還職一班
武進士二班外委一班功加難蔭及澎臺俸滿三年卽
陞千總此三項人員共一班効勞武舉一班各項捐納
人員一班投誠一班招民一班註冊千總一班共一十
班此從前之定例也後因裁缺還職外委投誠招民五
項到部候用者乏人卽將此五班俱借與揀選年滿千
總補用而註冊千總一班亦歸于揀選年滿千總補用
是雙月缺中揀選年滿千總已得六缺矣單月缺出定
例以現任小銜守備論俸推陞康熙六十一年七月內
九卿議覆將揀選年滿千總分發各省遇有雙單月缺

出無論題補地方不題補地方悉令補用以至雙月武進士功加難蔭効勞武舉捐納各項人員及單月現任小衙守備竟無陞選茲據武進士史節文等呈稱終身竟無銓選之期等情臣等竊思揀選年滿千總一項固係精銳之人所當急爲擢用而進士各項人等亦係輪班應用之員若使之無缺陞選實屬可憫臣等議得廣東福建江南浙江陝西四川雲南七省中有題補地方缺出仍盡歸于分發年滿千總照依次序補用外其不應題補應歸部選之缺出在雙月者仍將該缺還職外委招民投誠五缺借與分發年滿千總補用再五缺出

請歸于武進士功加難蔭澎臺俸滿千總効勞武舉捐
納人員輪班銓選再一缺出給與註冊千總挨次補用
如有無任可到之守備赴部另補者則不入此班次之
內隔選推用在單月者亦以一半歸于分發人員是年
滿千總盡得廣東等七省題補之缺又分部選雙單月
缺之半則精銳人才既得及時補用而武進士各項人
員俱各進身有階庶選法得平羣情踴躍

國家愈收得人之益矣疏下九卿議覆照所請行是月
皇上推恩舊臣以

聖祖御用衣物頒賜王公及舊大臣公蒙

賜黃瓣珊瑚素珠黃瓣小刀荷包羊囊荷包鳧掌荷包火鏢
刮鏢水晶眼鏡金星玻璃瑤瑯各鼻煙壺珠筆山烏拉綠端
石硯碼瑙水盛又蒙

特賜

聖祖御用貂皮帽青狐狄皮褂天馬皮袍羽緞紗縐袍褂較羣
臣尤爲優渥又

皇上垂念老臣至六十五歲以上者准于

紫禁城內乘馬公年不及數蒙

皇上特諭白潢不時顧問着騎馬進

紫禁城行走

隆恩異數有加無已是歲遇

恩詔誥授光祿大夫文華殿大學士兼兵部尙書加三級准給一品蔭生三月奉

旨充

聖祖仁皇帝實錄總裁官復奉

勅充

三朝國史大清一統志明史三館總裁官四月

賜貂皮四十六張人參六觔五月

賜御書國之輔佐四字扁額一幅八月

賜御筆詩扇一柄扇書

御製詩云密勿黃扉重清時掌國均平成需弼亮光輔貴經綸共勉三公職無慚一个臣蓼蕭多雨露每及老成人

至於每歲端陽中秋

賜宮花宮扇香囊紫金錠香手珠瓜餅菓品歲除

賜御書福字并鹿尾大鹿風羊鱗鯉魚九頭柑橙榛茶筍哈蜜瓜鮮荔枝諸食物不可殫述前後蒙

賜內府書籍

御製御書奎章璀璨自明以來內閣之職止于票本不與外議惟人主顧問始有奏對公感激

殊恩遇事陳奏嘗因兩江總督奏江西棚民哨聚爲盜知縣

施昭庭李珣於賊始發覺卽行撲滅請

旨議敘公卽具劄子備陳其事言江西地方界連閩粵江浙湖廣五省其間層巒疊嶂人跡罕到最易藏奸歷來有閩廣無產貧民就中搭蓋茅棚墾種蔴蕘名曰棚民十三郡中大半俱有此輩本非良善年歲豐登各安生業如遇歉收便出爲盜夥類旣多驅之則無所歸着聽之則須加防閑是以臣任江西巡撫時飭令地方印官將山內棚民逐戶清查照依土著編保甲之例每十戶中擇一老成者爲棚長于五十戶中擇一曉事者爲棚約各戶男婦人口備造清冊送縣存查其隻身無依者棚

長棚約查明來歷出具保結方許入冊如有匪人許其
出首受賞編戶造冊之後有續至者一概不許容畱通
行在案臣亦不敢謂此法爲善但在任三年棚民從未
出山生事今聞閩中匪類溫上貴竄入萬載山中棚民
始而容畱繼而烏合幸賴

皇上天威文武奮力一朝撲滅地方未至擾害又聞寧州銅
鼓營地方有流匪糾合棚民出劫之事現在江西文武
協心不難卽日就擒但每經蠢動百姓聞風奔避地方
不無驚擾語云涓涓不息流爲江河臣鰓鰓過慮與其
事發剿除莫若未事籌畫臣請

勅下該督撫或委事簡之道員及廉能府佐率領有棚民地方州縣親入山內查編設立長約盤詰匪類杜絕續至之人仍嚴禁入山官吏不許索取隻雞束草并勘明山內地方廣狹所居棚民多寡在于山口出入要路處所就近撥把總一員巡檢一員約帶兵丁鄉勇各若干名駐防以資彈壓以申訓約如此則奸匪絕蹤四境寧謐化山野之棚戶爲耕鑿之良民永沐

皇仁于無旣矣旋奉

聖旨將奏章交發巡撫施行蓋公心平天下不以旣去西江而漠視之也然公稟賦素弱每思引退嘗語子弟吾官

至宰輔榮已逾分若係戀不止必貽後悔且機務重大
年將七十體羸多病當止矣雍正三年七月遂具劄子
陳情力求解退

皇上許以解任調治公且感且喜扶疾詣

宮門謝

恩歸休私第越二載以從前江西任內捐銀代完四府落地
稅課未經

奏明吏議罷職公瞿然曰未奏而私免稅實吾過也怡然
自處惟日以

聖恩高厚未能報稱爲愧感激之念每食不忘焉公天資穎

異氣宇端嚴潛心于聖賢經濟之學不屑屑爲世俗利
達計立心行事黜華崇實終日無惰容亦無疾言遽色
與人則休休有容沖和恬靜服官四十餘年所至惟以
忠

君愛民爲念遇事有所見必盡其言有當于理而有濟于世
者則力爲之或撓之輒毅然不少回居官大節首砥廉
隅嘗曰人必潔已而後能奉公及任

綸閣凡僚屬親知偶有餽遺者皆卻謝卽食物亦不苟受
每謂第五倫雖卻千里馬選舉時猶不能忘情況實受
之乎交際惟義是重一切炎涼世態不入于胸臆黔撫

劉公罷職後奉

命往塞北軍前種地効力約需費銀萬兩劉公計無所出公
念舊曾受知力爲設措事訖有濟得以生還至于舉薦
人材尤所慎重外任封疆內居輔弼

陛奏密舉頗有其人皆祕密不使人知其昭著在人耳目者
如計典舉薦及坐名題補保舉行取不一其人然事前
不使本人知之薦後有洩登顯爵者有晉秩數階者亦
因公削職者要皆不失爲正人有因受公薦舉餽千金
爲壽者公方入典機務卻其金辭其使曰焉有爲
國薦賢而受人餽者乎歸語爾主封疆所任匪輕能始終

勉爲好官則報我多矣比公開居其人入歷崇階頓絕
往來知其事者咸爲不平偶語及之公爲誦唐人避賢
罷相詩一哂而已自是杜門謝客披閱經史閒遊東郊
菜圃以怡情焉圃去城不遠築室其中澆蔬植菓栽花
木與親舊相唱酬或圍棋茗飲以消白晝人世紛華一
切榮名虛譽等之浮雲識者高之先是雍正元年二月
因條陳守備銓選一疏下九卿覆准而當時用事貴人
勢燄薰炙惡公獨不趨奉因指註冊干總一缺謗爲賄
託公卽于是年九月解所兼樞部政務而後來者仰希
勢要風旨隨于十月疏請將註冊干總一缺毅然裁去

于是同一督撫保送之年滿千總分發者則選用無遺
註冊者則終身不用夫註冊將以用之也如可不用又
烏用註冊哉公聞之屢爲慨歎至雍正十一年

上命大學士鄂公爾泰整理兵部條陳選法特請將註冊千
總于雙月給還二缺于是註冊諸人沉淪禁錮十年於
茲者一旦復覩天日而公當日請用註冊千總之苦心
亦大白于天下以此知大臣任事稍存偏私則貽害匪
細而公忠體國則先事後事如出一揆此余所爲拳拳
於公之章奏謂有益于天下後世宜亟表而出之也公
曾祖葬蓋平縣北祖父並葬玉田縣東距京師遠遠每

念不忘碑石祭田悉心營辦且撥人戶守焉羣從子弟有可造就者卽爲延師課讀多取科名其材堪効用于時者不惜捐貲俾登仕版蓋公生平孝友篤於門內施於鄉黨不能備書也一子暎槐應補按察司副使公方在政府以盈滿爲懼

奏請以部曹用暎槐任禮部郎中數歲卽循例改旗職侍養人謂孝思醇篤能濟世云